

Tha fear Shùlaisgeir ag obair dian bho mhoch gu dubh fhad's a tha e air a' chreig. Eadar marbhadh, slaodadh, spionadh, dathadh, glanadh agus sgoltadh, chan eil duine diomhain. Bhiodh uiread ri naoi cairtean mònach aig eathar Shùlaisgeir 'gan toirt leatha o chionn fhada, is cha bhiodh fàd de'n sin nach biodh air a losgadh airson an dathaidh. Bhiteadh cuideachd a' cleachdadh closaichean nan gugannan a bha air an glanadh airson dathadh nan gugannan a bha air an spionadh. Bha an seann duine ag ràdha gun robh mìle a shlighe eadar an Càrn Mór agus Sròn a muigh Lunnasdail a rèir an rathaid chaim agus charraich air am biodh iad a' dol. Bheireadh Iain Caimbeul Thàboist 'na latha, o mhoch gu dubh a' giùlan fichead guga anns gach eallach troimh na bha'n sin de sgeirbeanan, is gun buille air anail aig deireadh an latha. Bu phailteas do dh'Aonghas Greum, no Aonghas Bàn, e an tréin an neirt.

Cha bu rud annasach uaireigin do dhà no trì mhiltean guga bhith tighinn do'n sgìre a h-uile bliadhna. Thug am "Pride of Lionel" 'na h-aonar dhachaidh bliadhna dà mhìle is seachd ceud guga. Is iongantach gum bheil uibhir de chluasagan glasa ann an sgìre 'san domhain is a tha ann an sgìre Nis.

A rèir coltais, bha na Hiortaich a' dol na bu neimheile chun a' ghuga na bha an Niseach fhéin. An uair a bha Màrtainn Màrtainn ann an Hiort, bho chionn còrr is dà cheud bliadhna gu leth, bha na naoi fichead duine bha 'san eilean ag ithe sia ceud is dà mhìle fhichead sùlaire 's a' bhliadhna. Nach ann aca a bha an latha dheth!



Triùir Niseach a' streap suas cladach creagach Shùlaisgeir an tòir air gugachan. (Stormoway Gazette)